

魏之琇先生

魏之琇。字玉璜。別號柳洲。清錢塘縣人。少孤貧。於街市間操作自給。既而執業質肆中。凡二十年。晝勞所職。夜篝燈讀書。久之豁然貫通。家本業醫。兼考醫籍。遂歸懸壺以自給。因校刊江瓘名醫類案。病其尚有未備。乃雜取醫書及史傳地志文集說部之類。分門排纂。成績名醫類案六十卷。大抵明以來事爲多。而古事爲瓘所遺者。亦間爲補苴。故網羅繁富。細大不捐。採摭既博。變證咸備。實足與江瓘之書互相參考。繼著有柳洲醫話。王孟英爲之搜集。並爲之分類詳按。編入潛齋醫學叢書行世。

魏 之 琇 醫 案 目 錄

汗症	一
傷風	四
熱病	六
厥症	七
嘔吐	八
泄瀉	三
痢疾	三
瘡疾	四
消渴	七
內傷	八
隔症	九

喘症	三
音瘡	三
血症	六
黃疸	七
痿症	六
諸痛	九
七竅	三
疝氣	三
調經	三
胎產	六

魏之琇醫案

武進徐衡之編纂
嘉定姚若琴

汗症

詹渭豐母年六旬外。素有肝病。因患瘧自五月至九月瘧愈。而他證蜂起。自汗如洗。徹夜不眠。食少便溏。脇痛齒痛。口淡惡心。惡風畏寒。頭頂皮帽。身襲皮衣。重幃夾帳。猶慄慄不勝。診時以止汗爲囑。脈之弦小急。知爲陰虛火盛。瘧邪未清。誤作陽虛。多與補氣斂汗之劑而然。叩之果服歸脾五味子麻黃節浮麥龍骨甚夥。乃與生地杞子地骨釵斛首烏鱉甲黃連萸仁。渭豐曰。諸醫咸謂頭爲諸陽之首。惡寒若此。又自汗而喜熱飲。明屬陽虛。今方中唯與養陰。又口淡便溏惡心。皆屬脾胃虛寒。黃連萸仁安可用。至瘧疾已愈。何必用首烏鱉甲。再所重在汗多。而又全不治汗。其故何也。曰。此證乃火鬱之極。內真熱而外假寒也。瘧本膽腑之邪。因肝虛而腑傳臟。故寒熱止而變

爲諸證。故以生地杞子地骨釵斛養肝治其本。黃連清伏暑。萸仁散鬱熱以治標。首烏鱉甲入肝而去瘧邪。蓋肝火熾盛逆胃。胃絡上蒸則爲汗。下迫則爲瀉。若見汗則固瀉。一藥肆人足矣。醫云乎哉。如方服之。數劑而愈。內經云。治病必求其本。今觀此症。益可信矣。

何某年七旬矣。偶於冬間。苦盜汗。乃水衰。肝火內熾。當閉藏之候。反蒸鬱之爲汗也。或教以黃芪煑黑棗服之。四五日汗果止而咳嗽作。或以爲傷風。與前胡桔梗杏仁蘇子秦艽防風之類。或以爲痰火。與二陳薑汁竹瀝。或以爲血虛。與四物知母黃柏咸不效。已半年。診其脈。則弦數而促。其證則痰多食少。天柱已傾。雙足浮腫。投以生地麥冬杞子地骨沙參女貞。四劑無進退。已召畫工傳真矣。告曰。某本籍越中。今病已膏肓。量不可起。治任欲歸。第乞疏一方。俾可服多劑者。以希萬一耳。仍前方加熟地萸仁與之。後二年。偶遇之客坐。彼前致謝甚殷。余茫然叩其故曰。某何姓。昔患咳嗽幾斃。蒙惠方。

渡江後服二十餘劑。竟獲全愈。此再造之德也。視其容貌。充腴迥非疇曩。其病之痊。殊意外矣。書此以爲輕信單方。并見汗治汗之戒。

楊元植年四旬外。早衰鬚髮盡白。素患肝腎病。客吳門病瘧。瘧愈而汗出不止。凡生脈飲六黃湯牡蠣龍骨五味黑豆。一切斂汗之藥。莫不嘗之矣。吳醫技窮乃遄歸。就予診。脈但虛數。與熟地一兩。杞子五錢。棗仁五錢。麥冬二錢。萸仁一錢。故黃連四分。地骨皮三錢。一服減。二服瘥。

趙坤維令王。病自首至胸。汗出如淋。動則尤甚。頗能食。然食入則滿面淋漓。衣領盡透。醫與玉屏風散。當歸六黃湯。俱不效。延診右關寸數大。問面浮及齒痛否。曰然。此少厥二陰之火。上逆胃絡也。與重劑玉女煎。入杞子五錢。川連少許。二帖而瘳。

楊兆成病瘧。瘧愈大汗如雨。一日夜約斗餘。醫盡力與固表收瀼。反較麻黃羌活爲甚。延診脈洪數有力。日啖粥十數甌。猶覺飢。蓋瘧時多服半夏

豆蔻蒼朮厚朴藿香橘皮諸燥烈之劑。擾動胃火而然。若與六黃湯。則汗止而瘡必更作。乃用生地一兩。石膏五錢。黃連八分。麥冬三錢。萸仁一錢半。一服減。二服瘡亦不作。

張玉書年近六旬。素患陰虛火甚。兩手脈上溢入掌心。夏月偶不快。就混堂澡浴。以圖汗解。歸而寒熱大作。頭痛。兩耳後焮腫。上連承靈。下至天牖。急邀余視。余適他出。別延外科。謂當成耳枕癰。勢甚危。投以搜風敗毒之劑。腦後肩甲。筋絡益抽。掣急絆。燥渴躁悶。小便淋瀝如火。迨余至。困憊不支矣。脈之洪數異常。知其中熱邪在陽明少陽。以陰虛過汗。火就升上。又爲風藥所鼓而然。不可與柴胡。乃君以黃芩石膏。臣以鮮乾兩地黃。佐以滑石生甘草。使以連翹木通。大劑飲之。次日腫痛減。腫處尙赤色。前方入萊菔一合。腫痛全消。再與導赤散合六一散。而愈。

傷風

孫敦夫女十歲許。冬日感冒寒嗽。專科與發散太過。反致身熱不退。更醫投六君子加炮薑五味一劑。熱退矣。而欬嗽轉甚。下利頻併。裏急後重。中有白膿。醫以退熱爲藥對證。再與之。則面赤口燥。惡食不眠。余過診其大父。因求視脈。脈之虛而駛。曰。四劑可愈。然必少衄血。與生熟地杞子各四錢。天麥冬蔓仁各錢半。乃詫曰。今病已洩瀉。又從而滑利之。甯不增劇乎。余笑曰。第服之。病自減。乃始進半鍾。覺欬嗽稍瘥。遂連進二劑。果愈四五。再以前方加酒芩酒芍各一錢。不二劑。衄血一小盞全安。或問故。曰。兒稟素弱。所病卽俗名火傷風也。不治亦愈。乃以荊防廣半芎蘇前桔諸燥藥。鼓動三焦之火。至陽擾而熱盛。後醫謂虛是矣。宜以甘寒潤澤與之。則證自平。乃用六君燥補。加以炮薑之辛溫。五味之酸斂。藉人參之力而熱退。其內燔之火。盡入于肺。若傷寒傳裏然。肺熱甚則下迫大腸而爲痢矣。其中白膿。乃燥金壅熱所化。與痢疾正同。茲但養其榮氣。潤燥清熱。病自愈也。又問何以知其當衄。曰。初

時下痢。則火從下泄。痢止餘熱反走諸絡而上溢。否則炮薑五味之性。何由稍釋。其衄也。亦猶傷寒陽明熱邪。得紅汗而解矣。

熱病

表姪凌二官。年二十餘。丙子患熱證初愈。醫卽與四君乾薑巴戟。諸氣分溫補藥。久之益覺憔悴。狀若顛狂。當食而怒。則嘔蓋折筋。不可遏抑。所服丸藥。則人參養榮也。沉綿年許。其母問予。予曰。此餘證未清。遽投溫補所致。與甘露飲方。令服十餘劑。遂痊。甲申夏復患熱證。嘔惡不眠。至七日擬用白虎湯。以先日服犀角地黃而吐。疑爲寒。不敢服。延一盧姓醫至。診其脈伏。按其腹痛。謂此疝證。非外感也。脈已全無。危險甚矣。姑與回陽。脈復乃佳。所用胡盧巴吳茱萸肉桂乾薑木香小茴香丁香青皮橘核等。約重三兩餘。令急煎服。蓋是日夜半當戰汗。故脈伏而厥痛。彼不審。以爲寒證也。乃用此方。黃昏服下。卽燥撥煩渴。揚手擲足。譫語無倫。汗竟不出。蓋陰液爲燥熱所劫。不

能蒸發矣。侵晨再亟診。脈已出。且洪數。而目大眚。及年壽間皆迸出血珠。鼻煤屑焦。舌漸黑。小便全無。令以鮮地黃四兩搗汁一茶盃。與之飲下。卽熟睡片時。醒仍燥擾。再與白虎湯。加鮮地黃二兩煎服。熱漸退。神漸清。次日漸進粥。二白睛赤如鳩目。繼而口鼻大發瘡瘍。改與大劑甘露飲。二十餘日。始便黑糞甚夥。猶時時煩擾。服前方五十餘日。忽大汗自頂至足。汗極臭。自是全瘳。

厥症

鮑綠飲妹病厥昏不知人。目閉鼻煽。年壽環口皆青。手足時時抽掣。自夜分至巳牌。湯水不入。脈之大小無倫次。謂此肺金大虛。肝火上逆。火極似風之候。惟獨參湯可愈。他藥不必受也。參已煎。或阻之。遂不敢與。一醫用菖蒲遠志。以開心氣。茯神棗仁以安神。麥冬貝母以清痰。辰砂鉄鏽水以鎮墜。奈藥從左灌入。卽從右流出。絕不下咽。羣視束手。時已過晡。則面額間漸變

黑色。令急灌參湯。猶可活。乃以茶匙注之。至六七匙。喉間汨然有聲。已下咽矣。察其牙關漸開。再以米飲一盞。和參湯灌下。遂目開身動。面額青黑之氣豁然消去。徐飲薄粥一甌。起坐而愈。後嘗復厥。但不甚。惟與地黃沙參麥冬杞子卽瘥。

嘔吐

鮑綠飲年二十餘。以夏月肩輿反歛。途次受熱。鼻衄盈盆。愈後偶啖梨。遂得吐證。蓋肝火而胃寒也。百治無效。聞道吐字。則應聲而嘔。以故家人咸戒之。後至吳門。就葉氏診。以其脈沉細。令服附子理中湯。人參薑附俱用三錢。服後出門。行及半里。覺頭重目眩。急歸寓。及門而仆。幸其尊人雅諳藥性。謂必中附毒。亟煎甘草湯灌之。良久乃甦。後去附子仍服三劑。吐轉劇。再往診。仍令服前方。遂不敢試。改就薛氏。告以故。薛用六君子湯。服四劑無驗。再求診。適薛他往。薛壻令照方加益智仁一錢。再服亦不應。又求診于孫某。其

方用甘草八錢。不下咽卽吐。因不復求治而返。偶以冬月送殯。感寒增咳。纏綿至夏。余偶訪則病劇。詢知爲向患吐。近復二便俱秘。已七八日不食。惟渴飲茶水。更醫數人。或令以艾灸臍。俱不應。請診之。見其面色青悴。脈弦伏而寸上溢。謂此緣脾陰大虧。木火熾盛。又因久嗽肺虛。肝無所畏。遂下乘脾而上侮胃。致成格關。幸脈不數易已也。宜先平肝。俾不衝而吐止。斯肺得下降而便行。令以黃連肉桂各五分。隔湯蒸服。飲下覺吐稍止。卽能食糕數塊。然二便脹不可支。令以大田螺一枚。獨蒜一枚。椿爛罨于丹田。以物繫之。不逾時。二便俱行。所下皆青色。遂霍然而愈。時甲戌五月二十七日也。後與六味加減入沙參麥冬等。咳嗽亦止。向後常服養榮之劑。吐不作矣。按葉氏爲天士之後人。乃名醫之子。不辨診候。孟浪從事。可爲一歎。

葉太史古渠。在上江學幕中。患吐證。久不愈。凡學使按臨之郡。必召其名醫診治。兩年餘。更醫十數。病日甚。歲暮旋里。或與二陳。加左金川連吳萸。

俱用五六分。服下少頃吐血碗許。脈之不數。第兩寸俱上魚際。左尺微不應指。彼欲言病源。及所服方藥。余曰。悉知之矣。第服余方五十劑。乃得痊。計熟地當用三觔許。乃訝然莫喻。問所患究何病。曰。彼上江名醫。不過謂病痰飲耳。所用方不過用四君六君已耳。遂拍按笑曰。一皆如言。但非痰飲何以多酸苦涎沫。今飲食日減。何以反重用熟地。曰。此證由於腎虛。肝失其養。木燥生火。上逆胃絡。肺金亦衰。飲食入胃。不能散布通調。致津液停畜脘中。遇火上衝。則飲食必吐而出也。四君二陳香砂類皆香燥之品。以之爲治。猶抱薪救火。反助之然。必滋水生木。潤肺養金。庶可獲效。第陰藥性緩。病既久。非多劑不瘳也。用熟地杞子沙參麥冬石斛等。出入加減。初服吐自若。十劑外吐遞減。食漸增。果至五十劑而愈。

倪首善年未二十。稟賦甚弱。早婚得吐病。或與二陳香砂等劑。轉甚。有用桂附者。服一劑覺不安。乃止。有教單食猪油者。初頗効。後亦不應。脈之虛

弦略數。與生熟地沙參麥冬川連萸仁四劑後。連去。又三十餘劑而痊。

高氏女七八歲時。卽病頭痛而嘔。或酸或苦。百治不效。其父詢余。余曰。此肝火上逆耳。與生地杞子沙參麥冬二三劑卽愈。後及笄。于春盡病復作。其父已歿。乃兄延數醫治之。所用皆二陳六鬱。香砂丁桂之類。經半年殺青。股無肉。其母泣令延余。仍以前方。每劑熟地一兩。二十餘劑乃愈。

金氏婦患吐證。蓋十餘年矣。所服香燥不可勝計。後左脇漸痛有塊。經水不行。脈澀數。善怒。延診辭不治。延不已。勉與六味加減服之。頗有驗。然一怒卽發。越半年而卒。

福建羅二尹悔齋。久病足痿。於去年春。嘗嘔而頭汗大出。醫療無效。乃不藥數月。漸可。隨於春間。又患不眠。治亦無痊。至秋後乃痊。今年春因公事寓杭。求針科治足疾。又爲灸中脘氣海等穴十餘壯。步稍良而嘔證大作。食入卽吐。絕粒數日。又不眠。服薑附萸桂二朮二陳等。覺有烟辣之氣上衝。診

之六脈。大如筋頭。兩寸皆溢出魚際。舌瘦小。伸之極尖。且舌顫黃。苔邊紅癰。額色赭石。鼻色薰焦。小便清白。大便常五日一行。謂此營氣大虧。肝腎之火。上逆胃絡。則嘔吐。浮入心胞。則不眠。與養心湯。加川連牛膝米仁。囑其驗小便。黃則病退。一劑卽不嘔能食。小便果黃色。二劑得眠。舌苔淡紅癰消。唯兩脅如有物。動輒牽引。加山梔川棟。二劑左脇之物卽墜下。又加枇杷葉熟地。萸仁去山梔川棟黃連牛膝二劑。右膝之物亦墜下。脈亦稍斂。大便二日一行。以期迫囑其照方服。至舌不顫乃可。或足疾再甚。慎進風燥之劑。所以云者。知其針之得瀉而暫愈耳。

泄瀉

宋復華兄尊堂年七十體素肥。長夏病泄瀉。診之曰。此肝木乘胃也。宜養肝腎則愈。勿治脾。與數劑。病已略減。會復華以事入都。家人另延醫。投以蒼白朮補骨脂肉豆蔻丁香縮砂仁建蓮扁豆之類。頻服至百餘日。肌肉枯

削動則忡惕眩暈。食入卽嘔。而下利益頻。始謝去。再延余。但與重劑。枳子地黃沙參麥冬米仁山藥。初加黃連三分。四劑隨減去。加人參一錢。四五劑亦減去。後加肉蓯蓉四錢。四劑。凡服藥一月而安。類皆甘寒潤滑之品。有泥景岳之說。謂吐瀉皆屬脾胃虛寒者。宜變通焉。

痢疾

張龍文年三十來。九月患痢。至十二月未瘥。已無腹痛後重。服補中益氣則不及至圍。且下轉數。延予治。與熟地杞子白芍棗仁米仁等。初甚逆。膈脹而痢且五色。幸彼能守藥弗更張。再進而痢遞減矣。洎歲暮已向愈。脈之兩關滑大。重按則弦。戒之曰。藥未可停。恐立春後病再發。已而果然。其鄰醫就余方加補骨脂砂仁木香廣皮之類。與之了不應。且昏睡而多汗。至四月中再求診。則以前方加沙參麥冬萸仁黃芩。未二劑而痊愈。後環跳穴及趾踵痛。流注無定。所狀如痢後風。仍以前方加知柏川連。數劑而安。

濮氏子。住湧金門外。甚貧窘。患久痢脫肛。諸治不効。乃入城就予診。雖相去二三里。途中必數登廁。肛既不收。行步殊苦。與補中益氣湯。加熟地一兩。炮姜一錢。服二劑竟愈。

范秀才年近七旬。戊子二月。患寒熱。原有痢病。至是胸脅少腹無不痛楚。下痢紅白。一名醫治之有年。其邀余診。蓋乘便耳。其脈弦數。所喜者滑。詢其小便短赤。此純屬肝火下迫。似痢而非痢也。必多服香竈。又值君火司天。少陽當令。於是乘其所勝。而侮其所不勝。所下皆太陰血津。陽明脂膏也。與生女貞沙參麥冬川連萸仁。一劑已逾半。而名醫曰。七十之年。可服黃連之苦寒。萸仁之滑泄乎。今下痢而不與調氣健脾。而反用滋陰潤肺。此何治邪。范乃拘儒。復聽之治。又一月。將斃矣。再延診。仍前方加杞子白芍甘草。數劑痢止。痛除而愈。

瘧疾